



*D. O. M.*  
 DE FRACTURÂ STERNI.  
 T H E S E S  
 ANATOMICO-CHIRURGICÆ.



UO nobiliori munere insigniuntur Corporis humani; viscera ed potentioribus muniuntur vallis; cerebrum miraris? Calvariam spectes: nunc sese offert thorax vitalium stupenda officina, Regio corporis perpetuò mobilis, in quâ cor nobilissimum circulationis centrum, pulmo laxissimum & mollissimum sanguificationis instrumentum, continentium partium præsidio & tutelâ, tam mirabiles edunt motus. Duplici igitur modo considerata venit pectoris fabrica, scilicet, relative ad partes continentes vel ad contentas; tanta autopsiæ committere vetat instituti ratio: de Sterni fracturâ agentibus, hujus ossis figura, situs, substantia, connectiones & usus sufficientem præbent admirationis ansam.

CONTEA illa cavitas collum inter & abdomen sita, thorax sive pectus dicitur. Hanc efformant partes ossæ, cartilaginossæ, musculosæ, membranaceæ, vasaque omnis generis. Clauditur superius claviculis, asperâ arteriâ, gulâ, venis jugularibus, arteriis carotidibus, thimo, &c,

A



inferiùs diaphragmate; firmatur posteriùs vertebris dorsalibus, anteriùs Sterno & cartilaginibus costarum, à lateribus costis in veras distinctis & spurias; hanc cingunt muscoli varii & tegumenta corporis communia.

STERNI nomine intelligitur os longum, planum, umbonis in modum cordi ac vitalibus contentis objectum, indè scutum cordis, etiam pectoris os, Græcis, *στέρον στήδεσ*, *ἑρπονδής*, *Στέρον* quasi firmum, quodd sub hoc osse mentis esse firmitudinem putarent; hinc est quod latini cordatos vocarint: eò respicit horatius: *non tu corpus eras sine pectore?* Tribus constat in adultis partibus, in infantibus sex; verùm quoniam harmoniæ intermediæ major pars paulatim obliteratur, pro uno considerandum venit. Hoc autem interiùs modicè excavatum, exteriùs paululum protuberans, partim ut firmiùs esset, partim ut rotunditari pectoris quantum posset conferret; superiùs latius, paulatim, descendendo angustatur; parte superiore quâ radicem sive initium tangit colli, ipso sui medio semilunatum ostendit sinum quem utrinque claviculæ claudunt: Hic peculiari voce *σφαγή* Græcis, Latinis jugulum sic dictum quodd vulnera hîc incidentia certò jugulent; undè Virgilius: *Hæc loquitur, jugulo que haud inscius accipit Ensem.*

PARTI jugulo perpendiculariter oppositæ adhæret cartilago, insigni *ἑρπονδής* nomine distincta quam Latini mucronatam, ensiformem, gladialem vocant respectu figuræ; hanc verò alii respectivè ad usum, clipealem & scutum stomachi denominant: Pro parte ossis in adultis, sed vix in totum nisi senioribus.

LATERALES Sterni partes septem foveolis insigniuntur & in sinu suo foveant extremitates cartilaginum septem costarum sequenti ordine: scilicet primæ costæ cartilago intimè, propè claviculæ artron, superiori Sterni parti connectitur; secundæ costæ cartilago insculpta reperitur inter primæ portionis Sterni & secundæ extrema contigua; Sequentes verò ut sequuntur eò sunt ad invicem proximiores. Hæ porro articulationes in infantibus, mobilitate & sinoviâ gaudent, in adultis verò, præsertim senibus, quasi anchiloses naturales fiunt & unâ conferruminantur.

SUBSTANTIAM Sterni si respicias, mollis ea, fungosa, meditullio insignita ac levis est; hanc rem non nullis interdum ægris usui esse arbitratur celeberrimus Paaw, illis nempe quibus noxia materia sub Sterno, spatio mediastini intermedio collecta reperitur; sectione enim in Sternum instituta, illis succurrere solet; at verò ob fungosam consistentiam, minori negotio perforari potest.

CONNECTITUR Sternum anteriùs musculis pectoralibus, obliquis externis & rectis abdominalibus, posteriùs musculo triangulari Sterni dicto, plevræ & mediastino; superiùs musculis Sterno-mastoideis, sterno-hyoideis, sterno-tiroideis, inferiùs diaphragmati, obliquis



3

affendentibus & transversis abdominis, & à lateribus costarum cartilaginibus, earumque musculis & ligamentis.

TRES habet Sternon usus 1°. ut cordi ac vitalibus propugnaculo sit; 2°. ut costas sibi invicem firmiter devinciat; 3°. ut mediastini fulciat membranas, eâ ratione impediens ne pericardium in cor se præcipitans, ejus motui impedimento existat.

SOLURA cohesio in partibus Sterni à causâ contundente fractura audit: hæc plerumque gravissimis stipata symptomatibus difficile sensibus percipitur nisi recentissima; factâ enim in partibus aponevroticis Sternum ambientibus contusione, sequitur ingurgitatio vehemens quæ in dignoscendâ fracturâ digitos fallit.

DUPLICI modo considerari potest Sterni fractura 1°. quatenus simplex est quod infrequens; vel quatenus composita aut complicata quod sæpius accidit; vix enim frangi potest sternum quin arteriæ & venæ sub eo latentes lædantur aut disrumpantur, proindèque pectoris dolores, spirandi difficultas, tussis, sanguinis intrâ mediastini lamellas aut in cavum thoracis profusio, dispnæa, &c. oriantur.

OMNIA instrumenta contudentia aut dura sive immissa, sive resistentia inter hujus fracturæ causas annumerari solent; undè ictus, lapsus, contusiones, glandes plumbeæ, aliaque ex machinis ignivomis corpora frequentiorém huic malo præbent ansam.

DIGNOSCITUR sterni fractura primo instanti fracturæ, inæqualitate, mobilitate partium & crepitatione quæ digitis admotis perlenitur; sed mox, grassante ingurgitatione, urgentibus pectoris doloribus, spirandi difficultate, febre, hæmoptisi, cardialgiâ aliisque gravissimis symptomatibus statuenda diagnosi.

IN genere mali ominis est Sterni fractura; nam quæ simplicissima, fronte primâ, videtur, plurimis, ratione substantiæ ossis mollioris & spongiosæ potest accidentibus stipari: si enim liquidum os illud permeans non gaudeat tenuitate & mobilitate necessariâ, brevi stagnabit; à stagnatione acris fiet, ab acredine orietur destructio lamellarum medullium constituentium; proindèque caries in ossè cylindrico & solidiore mala, sed in extremitatibus ossium ut & in Sterno pessima & vix sanabilis: desumitur quoque prognosis à causâ & accidentibus, quæ enim ab instrumentis ignivomis fit, vix ullam admittit spem curationis.

IN curatione tria potissimum attendenda sunt 1°. ut fragmenta ritè ad invicem coadunentur, 2°. ut debitâ fasciatione firmentur, 3°. ut accidentia præsentia debellantur, futura que præcaveantur. Repositio & coadunatio fragmentorum in fracturâ Sterni, licet plurimis tentanda modis, non ita facilis; è regione fracturæ pulvinar duriusculum aut panem tanquam corpus durum ægro decumbenti imponendum suadet Juncker. (a) interim minister humeros deprimit, Chi-

(a) Conspect. Chirurg. pag. 451.



*Virgus* utrinque costas comprimit; æger interdum aerem retinet & sic ossa sæpius in situm naturalem reponuntur. *Ægrum* in ventre decumbi jubet Joannes de Vigo (a) imposito sub humero duplici pulvinari duriusculo; tunc scapulam graviter premat Chirurgus donec fragmenta in suas sedes reponantur, & ope digitorum coadunentur; sed contingere quandoque potest ut commendata artificia parum sint, præsertim si symptomata urgeant; cutem igitur decussatim contra incidere ne dubites, nudatasque Sterni partes vel per vectem quem elevatorium vocant, vel per terebram leniter prius intortam fursum versus attollere propera. (b)

Si verò ab accidentium sævitiâ, sanguinis profusione, vel intrâ mediastini lamellas (quod rarò propter frequentioremediastini situm in latere sinistro Sterni, ut egregiè Demonstrat DD. de Senac (c) & autopsyâ patet) vel quod frequentius accidit in ipsum thoracis cavum sanguis pus, alii-ve liquores flagent; si prius, inferiorem Sterni partem à latere modiolò terebrandam in adultis, in junioribus enim scalpellum ad id sufficiet; si posterius ad empyema confugiendum arbitramur.

PARTIUM deligatio mediantibus spleniis vino & spiritu vini calido madentibus, additis mantile & scapulari, in simplici fracturâ perficitur; in complicatâ verò, pro accidentium naturâ differt; & in genere petitur à regulis de pectoris vulneribus traditis.

(a) Lib. VI. de Fracturis pag. 866.

(b) Illustriss. DD. de la Martinière, tantam adhibuit solertiam in curandâ sterni fracturâ, ut licet sublatis plurimis fragmentis, cum videretur arteria mammaris interna pulsans; illasâ tamen, convaluerit æger.

Huic Methodo assentire videntur Heyster Inst. Chirurg. Lib. II. Cap. VI. pag. 196. Goueyus Chirurg. ver. pag. 111, Petitus Lib. II. de morb. oss. Cap. V. pag. 100. ubi de Sterni fracturâ. Platner Inst. Chirurg. pag. 738, §. 1266.

(c) Traçtat. de Corde Tom. 1. pag. 4.

Has Theses, DEO DUCE, & Præside M. JOANNE-CLAUDIO MERTRUD, Artium & Chirurgiæ Magistro, tueri conabitur FRANCISCUS ROJARE, Parisinus, Artium Liberalium, in Almâ Universitate Parisiensi, Magister & Nosocomii Generalis Parisiensis in Domo dictâ Bicêtre, Chirurgus Præcipuus.

P A R I S I I S,

IN REGIIS CHIRURGORUM SCHOLIS,

Die Sabbati 10<sup>a</sup> Octobris à sesqui-secundâ post meridiem ad septimam. Anno R. S. H. 1761.

PRO ACTU PUBLICO  
ET SOLEMNI COOPTATIONE

Typis P. AL. LE PRIEUR, Collegii & Acad. Reg. Chirurg. Typographi,  
viâ San-Jacobeâ, sub signo Olivæ, 1761.